



LITAZION

DEL CONSEI PROVINZIÈL E DEL PRESIDENT DE LA PROVINCIA

21 de otober del 2018

Normes prinzipèles per la litazion

LEGE PROVINZIÈLA DAI 5 DE MÈRZ DEL 2003 N. 2

Art. 34 L.P. 2/2003 - Document per poder litèr

1. L litador l lita te la sezion litèla dò aer moscià l document per poder litèr aldò de la normativa statèla, dessema con n document de identificazion.

2. Ai litadores foradecà ge vegn fat a saer che vegn chiamà ite i comizies litèi tras na chërta-avis che ge vegn manà dai comuns e i tol pèrt a la litazion col document per poder litèr aldò de la norma statèla.

3. L ofize litèl de comun, se fossa de besegn de dèr fora i documenc per poder litèr, l sarà avvert a la jent ti cinch dis dant de la litazion, da les nef enscin les set da sera e la di de la litazion per dut l temp che jirà inant la operazions de la litazion.

Art. 1 D.P.R. dai 8 de setember del 2000, n. 299 - Istituzion de la tessera litèla

1. (Omissis) vegn metù en esser la tessera litèla personèla, definitiva, al post del zertificat litèl e che à sia medema funzioms.

2. Ge vel moscèr la tessera litèla te la sezion litèla, dessema con n document de identificazion, per poder litèr te ogne litazion o referendum.

Art. 51 L.P. 2/2003 - Azess a la sala de litazion

1. Pel ite te la sala de la litazion demò i litadores che à l document per litèr.

2. No se pel aer dò èrmes o strumenc per fèr del mèl.

Art. 53 L.P. 2/2003 - Litadores che pel litèr te la sezion.

1. Pel litèr te la sezion:

a) chi che l'è scrit ite te la lista di litadores de la sezion;

b) chi che à dò na sentenza de la Cort de Apel o na atestazion de l'Ombolt, data fora aldò de l'art. 32 bis del decret del President de la Republica n. 223 del 1967, che l lo declarea litador del Comun;

c) l President, i dombradores, l secretèr de l'ofize litèl e i raprejentanc de la listes di candidac, estra che i ofiziai e i polins de la forza publica en servije de órden publich, a la condizion che i sie scric ite te la listes litèles de n comun del colege;

d) i candidac.

2. I litadores scric te la letres a), c) e d) del coma 1 i cogn ampò moscèr l document per litèr e chi scric te la letres b), c) e d) del coma 1 i vegn scric ite dal president japede la lista de la sezion e noté sù sul verbal.

Art. 54 L.P. 2/2003 - Militères che fèsc pèrt de corpes endrezé a na vida militèra e de la polizia de Stat

1. I militères de la forzes armèdes e chi che fèsc pèrt de corpes endrezé a na vida militèra al servije del Stat, estra che chi che fèsc pèrt de la polizia de Stat i pel litèr tel comun olache i é per rejon de servije a la condizion che i sie litadores del Consei provinzièl.

2. Ic pel litèr te ogne sezion litèla dò aer moscià l document per litèr, apede i litadores scric ite te la lista e con prezedenza respet a chisc e i vegn scric ite te na lista aposta de enjonta.

3. L scric ite te la lista e con prezedenza respet a chisc e i vegn scric ite te na lista aposta.

Art. 55 L.P. 2/2003 - Ricoveré te ospedèi e lesc de cura e prejonieres a chi che no ge é stat tout l derit de litèr

1. I ricoveré te ospedèi e te lesc de cura e i prejonieres a chi che no ge é stat tout l derit de litèr olache i é ricoveré o olache i é prejonieres, pur che i sie scric ite te la listes litèles de n comun del colege olache l'è l'ospedèl, la cèsa de cura o l lech de prejonìa e i abie l requisit de residenza per poder litèr tel colege.

2. Per chesc, amàncol trei dis dant de la litazion, i interessé i cogn ge manèr a l'ombolt del comun olache i é scric ite te la listes litèles na declarazion con sù sia volontà de litèr tel lech de cura o de prejonìa. Japede la declarazion, olache cogn esser scric sù avisa l numer de la sezion del litador e sie numer de enscinuazion te la lista litèla de la sezion, che se l veit sul document per poder litèr, cogn esser ence l'atestazion del diretor sanitèr del lech de cura o de l'istitut de prejonìa, che conferma che la persona la é ricoverèda o prejoniera e la cogn vegnir manèda al comun dal diretor amministratif, dal secretèr del lech de cura o dal diretor de l'istitut de prejonìa.

3. (Omissis)

4. I litadores scric te chesc articol i pel litèr demò moscian l document per litèr e la atestazion (data fora da l'ombolt), che la vegn tutta sù dal President de l'ofize litèl o de l'ofize litèl spezièl e enjontèda tel register olache l'è sù i numeres di documenc per litèr di litanc.

Art. 58 bis L.P. 2/2003 - Litazion a cèsa de litadores che depen da machines eletromedicales

1. Per i litadores che à na malatia tant grieva che no i pel jir fora de cèsa e che sia vita depen a dò a dò da machines eletromedicales vegn metù en doura l'articol 1 del decret-lege dai 3 de jené del 2006, n. 1 (Despojizions de prescia per la litazion a cèsa de vèlch un litador, per la rilevazion informatisèda del dombrament e per l'amiscion te la sentes di osservadores OSCE, per la litazions politiches che vegnarà), convertì, con mudazions, da la lege dai 27 de jené del 2006, n. 22.

2. Chesc articol l vegn metù en doura demò se chi che à derit de litèr stèsc sul tegrin de la Provincia e l'à derit de litèr per la litazions provinzièles.

Art. 1 Decret-lege 1/2006 - Litazion a cèsa per litadores che à n impediment tant grief che no i pel jir fora de cèsa

1. I litadores che à n impediment tant grief che no i pel jir fora de cèsa, nience se emprevalan di servijes scric te l'articol 29 de la lege dai 5 de firé del 1992, n. 104, e i litadores che à n impediment tant grief che sia vita depen a dò a dò da machines eletromedicales e che no i pel jir fora da cèsa, i pel litèr a cèsa sia.

2. (Omissis)

3. I litadores scric tel coma 1, anter l caranteisem e l vinteisem di dant de la litazion, i cogn ge manèr a l'ombolt del comun olache i é scric ite te la listes litèles:

a) na declarazion, sun papier zenza bol, che atestee la volontà de litèr a cèsa con scric avisa la direzion;

b) n zertificat, dat fora dal funzionèr medich enciarià dai orghegn de l'azienda sanitèra locala competenc, con su na data no dant che carantacinch dis dant de la litazion, che atestee l'impediment scric tel coma 1, con na prognosa de amàncol sessanta dis da la di che vegn dat fora l zertificat, opuramenter de la condizions de dependenza a dò a dò de sia vita da machines eletromedicales.

3-bis. (Omissis)

4. Se su la tessera litèla del litador scric tel coma 1 no l'è jà stat notà sù che l'à derit a l'assistenza per litèr, l zertificat scric tel coma 3, letra b) l'atestea l besegn de n compagnador per litèr.

5. (Omissis)

6. (Omissis)

7. La stima la vegn tutta sù, endèna la ores che la litazion la é averta, dal president del ofize litèl de sezion de la circoscrizion che tol ite la direzion che l litador l'à declarà avisa te la declarazion scrita del coma 3, dessema con un di dombradores de l'ofize litèl, cerdù a la brusca, e col secretèr. A la operazions de litazions a cèsa pel tor pèrt i raprejentanc de lista che i lo domane.

8. (Omissis)

9. (Omissis)

9-bis. (Omissis)

Art. 59 L.P. 2/2003 - Dèr jù la stima. Formalità

1. La stima la vegn data jù dal litador te cabina.

2. Se l litador no l lita te cabina l president de l'ofize litèl l cogn ge tor la zedola e la declarèr no bona. L litador no l podarà più litèr. L president l fèsc scriver tel verbal chesc tant.

3. I litadores no i pel se fèr raprejentèr e nience manèr sia stima per scric.

4. I litadores verces, chi che no à la mans, chi che é paralisé o à n auter impediment grief someent, i sentadins pedimenté che no é bogn de litèr da soi i pel l fèr col didament de n compagnador cerdù a na vida volontèra. L compagnador l cogn esser scric ite te la listes litèles de n comun de la region.

5. Negun litador pel fèr da compagnador a più che una persona pedimentèda. Sul document per litèr del compagnador l president de l'ofize litèl l nota sù che l'à metù en esser chesta encèria e tel verbal vegn scric sie inom e sie inom de familia.

6. I zertificac medics moscè i vegn enjonté tel verbal e i é valevoi demò se i é stac dac fora dai funzionèrs medics enciarié dai orghegn competenc enciarié de la gestion de la sanità; i enciarié no i pel esser candidac e nience parenc enscin al quarto nivel di candidac.

7. Chisc zertificac i cogn atestèr che l'impediment fisich no l ge permet al litador de litèr zenza l didament de n auter litador. I zertificac i cogn vegnir dac fora sun papier zenza bol, sobito e debant e zenza che ge vobie paèr deric o meter sù boi.

8. Al post del zertificat medich, se l'è stat domanà, i verces i pel moscèr la tessera de enscinuazion a la union talièna verces.

Art. 61 L.P. 2/2003 - Identificazion di litadores

1. I litadores i pel litèr aldò de canche i rua, zenza jir dò l'órden de enscinuazion te la lista.

2. Se no vegn moscià n document de identificazion con su n retrat, un di comembres de l'ofize l'atestea l'identità del litador con sia sottoscrizion te la colona aposta de la lista autenticèda da la comiscion o sotcomiscion litèla del raion.

3. Se no l'è nience un comember de l'ofize che pel atestèr, sot sia responsabilità, l'identità del litador, chesc l pel portèr n auter litador del comun, cognosciù da l'ofize, che l'atestea sia identità. L president l met en consaputa chesc ùltim litador che se l disc bujies, l vegnirà ciasià descheche poverit la lege. L litador che l'atestea la identità l cognarà se sotscriver te la colona aposta de la lista scrita tel coma 2.

4. Tel cajo che no se se corde dintornvia l zertament de la identità di litadores dezide l president (Omissis).

Art. 62 L.P. 2/2003 - Ciapèr, scriver ite e reter la zedola de litazion

1. La litazion del Consei provinzièl e del President de la Provincia la vegn fata su na zedola demò, olache l'è sù l'inom de familia e l'inom di candidac a la encèria de president, i simboi de la listes leèdes e apede ogne simbol, l post per scriver ite la stimes de preferenza per l Consei provinzièl.

2. Ogne litador l dèsc jù la stima per un candidat a la encèria de President de la Provincia e per una de la listes leèdes fajan n segn col lapisc copiatif sul simbol de una de chesta listes e, se l vel, ence su l'inom del candidat a la encèria de President de la Provincia. L segn fat demò su l'inom del candidat a la encèria de President de la Provincia l vèl ence desche stima per la lista o per l grop de listes leèdes. L segn fat demò sul simbol de na lista l vèl ence desche stima data jù per l candidat a la encèria de President de la Provincia e chel che la lista medema la é leèda. No se pel dèr la stima per un candidat a la encèria de President de la Provincia e ensema ence na stima per una de la listes che no les é leèdes a chesc.

3. (Omissis)

4. Dessema co la zedola litèda ge vel dèr de return ence l lapisc.

5. (Omissis)

6. (Omissis)

Art. 63 L.P. 2/2003 - Dèr jù la stima per la litazion del Consei provinzièl e del President de la Provincia

1. La litazion del Consei provinzièl e del President de la Provincia la vegn fata su na zedola demò, olache l'è sù l'inom de familia e l'inom di candidac a la encèria de president, i simboi de la listes leèdes e apede ogne simbol, l post per scriver ite la stimes de preferenza per l Consei provinzièl.

2. Ogne litador l dèsc jù la stima per un candidat a la encèria de President de la Provincia e per una de la listes leèdes fajan n segn col lapisc copiatif sul simbol de una de chesta listes e, se l vel, ence su l'inom del candidat a la encèria de President de la Provincia. L segn fat demò su l'inom del candidat a la encèria de President de la Provincia l vèl ence desche stima per la lista o per l grop de listes leèdes. L segn fat demò sul simbol de na lista l vèl ence desche stima data jù per l candidat a la encèria de President de la Provincia e chel che la lista medema la é leèda. No se pel dèr la stima per un candidat a la encèria de President de la Provincia e ensema ence na stima per una de la listes che no les é leèdes a chesc.

3. Ogne litador l pel dèr jù enscin a doi stimes de preferenza per i candidac a la encèria de conseier provinzièl de la lista che l'à cerdù fora. Se l dèsc jù duta does la stimes una la cogn esser per n candidat om e una per na candidata femena; alincontra la seconda preferenza la vegn anulèda. La stima de preferenza la vegn data jù col scriver col lapisc copiatif l'inom de familia di candidac te la righe segnèdes su la scheda, apede l simbol de la lista cerduda fora. Cò l candidat l'abie doi inomes de familia, l litador l pel en scriver demò un. Cò se podessa confoner n candidat con n auter, l litador l cogn scriver duc doi i inomes de familia, opuramenter la di e l lech de nasciment del candidat cerdù.

4. No se pel fèr segnes o scriver zeche de auter.

Art. 64 L.P. 2/2003 - Fin de la litazion

1. La litazion la cogn jir inant enscin les diesc da sera. Aboncont i litadores che da chela ora i é amò te la senta litèla i podarà litèr.

Art. 68 L.P. 2/2003 - Stimes e zedoles bones e no bones

1. La validità de la zedola e de la stimes che l'è sù la cogn esser data canche la volontà del litador la é chièra.

2. No les é bones la zedoles:

a) che no l'è cheles pervedudes (Omissis) o che, ajache endèna la litazion les é sciampèdes al control, no les à sù l stempel (Omissis);

b) canche, enceben che no sie su la stima per una lista e per un candidat, l'è scric sù zeche de auter.

3. No les é bones la stimes scrites te zedoles:

a) olache l'è sù scrites o segnes che pel fèr pissèr a na vida chièra che l litador l'à volù fèr recognoscer sia stima;

b) olache l litador l'à dat jù la stima per più che una lista e chesta listes les é leèdes a più che un candidat a la encèria de president;

c) olache l litador l'à dat jù la stima per più che un candidat a la encèria de President de la Provincia;

d) olache l litador l'à dat jù la stima per un candidat a la encèria de president e per una de la listes che no la é leèda a el.

4. (Omissis)

Art. 69 L.P. 2/2003 - Stimes de preferenza bones e no bones e leam co la stima de lista

1. La preferenzes dates jù dò la terza no les vegn conscidrèdes.

2. No vegn conscidrà nience duta la stimes de preferenza dates jù per candidac che fèsc pèrt de na lista desvaliva da chela litèda o per l candidat a la encèria de president.

3. La preferenzes olache no se enten delvers per colun candidat de la medema lista che les é states dates jù no les é bones.

4. Se l litador no l'à fat n segn sun negun simbol de lista, ampò l'à dat jù sia preferenzes apede l simbol de na lista per candidac che fèsc pèrt duc de chela lista, se enten che l'abie dat jù la stima ence per la lista che l'à chel simbol.

5. Se l litador l'à fat segnes su più che un simbol de lista, ampò l'à dat jù preferenzes per candidac che fèsc duc pèrt de na demò de chesta listes, la stima la vegn data a la lista de chela che fèsc pèrt i candidac cerdù.